

## **Mušan Topalović Caco, šehid ili ratni zločinac - šta reći učenicima Osnovne škole „Edhem Mulabdić“ u Sarajevu?**

“Zauvijek ćemo se, s tugom i poštovanjem, sjećati naših ubijenih sugrađana”

Ovaj tekst se nalazi na spomeniku pored jame Kazani iznad Sarajeva.

Ubili su ih pripadnici 10. brdske brigade Armije RBiH, kojom je komandovao Mušan Topalović Caco. Topalović je ubijen 26. oktobra 1993. godine u operaciji Trebević 2 prilikom hapšenja, koje su organizovali Armija BiH i MUP BiH. Tom prilikom poginulo je devet pripadnika MUP-a BiH.

Pročitah neki dan da je ploča sa imenom Mušana Topalovića (1957- 1993) diskretno vraćena na fasadu Osnovne škole „Edhem Mulabdić“ u sarajevskoj opštini Stari Grad. Na fasadi ove škole nalazi se više spomen-ploča s imenima poginulih vojnika Armije BiH iz ove opštine.

Sada dolazimo do nekoliko veoma bitnih pitanja koja se tiču suočavanja s prošlošću.

Prvo pitanje je vrlo jednostavno, ako se ime Mušana Topalovića Cace nalazi na fasadi osnovne škole, zašto se ne može naći na spomeniku ubijenim Sarajlijama na Kazanima?

Ne znam, to bi trebala da nam objasni gradonačelnica Sarajeva Benjamin Karić, koja očito nema problem sa ovom kontradiktornošću.

Kada je Naša stranka predložila da na spomeniku na Kazanima piše: “Na ovom mjestu su, po naređenju Mušana Topalovića Cace, komandanta 10. brdske brigade Armije RBiH, tokom 1992. i 1993. ubijeni građani i građanke Sarajeva. Za zločine je osuđeno 14 pripadnika brigade. Broj žrtava nije konačan.”, taj prijedlog je odbilo 10 vijećnika Gradskog vijeća Sarajeva, šest je bilo suzdržano, a četvorica nisu glasala.

Za ovaj prijedlog glasalo je pet vijećnika.

Izgleda da u memorijalizaciji i sjećanju grada Sarajeva postoje dva Mušana Topalovića, jedan koji je šehid i on se nalazi na zidu osnovne škole, dok je drugi ratni zločinac i i on se ne spominje na spomeniku na Kazanima.

Drugo pitanje se tiče samo Sarajeva.

Pošto se na zidu Osnovne škole „Edhem Mulabdić“ nalaze spomen-ploče s imenima poginulih vojnika Armije BiH iz te sarajevske opštine, onda je sasvim moguće da na tom istom zidu stoji ploča Mušana Topalovića Cace i nekog od devet vojnika Armije BiH ili policajaca koje su on i njegovi saborci ubili tokom pokušaja hapšenja. Neki od tih mladića su prije odlaska u vojnu bezbjednost bili policajci Policijske stanice Stari Grad.

Na istom zidu i zločinac i žrtva i zavjet čutanja, da se ne bi pokvarila slika o proteklom ratu.

Ne znam kako Sarajlije danas objašnjavaju ratni put Mušana Topalovića Cace, ali sam potpuno uvjeren da mu nije mjesto na fasadi bilo koje osnovne škole pa i ove u sarajevskom Starom Gradu.